

III. OUTRAS DISPOSICIÓNS**UNIVERSIDADE DA CORUÑA**

RESOLUCIÓN do 27 de xullo de 2026 pola que se establece a composición da Mesa de Contratación Permanente.

O artigo 326.1 da Lei 9/2017, do 8 de novembro, de contratos do sector público (LCSP/2017), establece que nos procedementos abertos, abertos simplificados, restrinxidos, de diálogo competitivo, de licitación con negociación e de asociación para a innovación, os órganos de contratación das administracións públicas estarán asistidos por unha mesa de contratación. Nos procedementos negociados en que non sexa necesario publicar anuncios de licitación e nos procedementos a que se refire o artigo 159.6, a constitución da Mesa será potestativa para o órgano de contratación.

A renovación do equipo de goberno fai necesario adaptar a composición da Mesa de Contratación Permanente establecida na Resolución do 29 de abril de 2026, co fin de adecuar a designación das persoas integrantes á actual estrutura do goberno da institución.

De conformidade co previsto no artigo 326 da LCSP/2017 e no artigo 21 e seguintes do Real decreto 817/2009, do 8 de maio, polo que se desenvolve parcialmente a Lei de contratos do sector público, e no exercicio das facultades que lle confire o artigo 126 dos estatutos da Universidade da Coruña, este reitorado

RESOLVE:**Primeiro. *Composición da Mesa de Contratación Permanente***

Desígnanse as persoas integrantes da Mesa, así como as suplentes, que se citan a seguir:

1. Presidencia: a persoa titular da Secretaría Xeral.

Suplente: a persoa titular da Xefatura de Sección da Secretaría Xeral.

2. Vogais permanentes:

a) A persoa titular do Vicerreitorado con competencias en materia de economía.

Suplente: a persoa titular da Vicexerencia con competencias en materia de economía.



b) A persoa titular da Xefatura do Servizo de Control Interno.

Suplente: Xefatura de sección ou, na súa ausencia, dun negociado do Servizo de Control Interno.

c) Xefatura do Servizo de Asesoría Xurídica.

Suplente: Xefatura dun negociado da Asesoría Xurídica.

d) Xefatura do Servizo de Contratación Administrativa.

Suplente: Xefatura dun negociado do Servizo de Contratación Administrativa.

3. Secretaría: Xefatura da Sección de Contratación.

Suplente: Xefatura dun negociado do Servizo de Contratación Administrativa.

Segundo. *Normas de funcionamento da Mesa*

1. Para a válida constitución da Mesa, deberá estar presente a maioría absoluta das persoas integrantes e, en todo caso, o/a presidente/a, o/a secretario/a e os dous vogais que teñan atribuídas as funcións correspondentes ao asesoramento xurídico e ao control económico orzamentario do órgano de contratación.

2. Todas as persoas integrantes da Mesa terán voz e voto, agás a persoa que desempeñe a Secretaría, que asistirá ás reunións con voz pero sen voto.

3. A Mesa poderá requirir a asistencia de persoal técnico especializado ou de persoas expertas independentes con cualificación adecuada en relación co obxecto do contrato, que actuarán con voz e sen voto. A súa asistencia será autorizada polo órgano de contratación e deberá ser reflectida expresamente no expediente, con referencia ás identidades deste persoal técnico ou experto, e á súa formación e á súa experiencia profesional (artigo 326.5 da LCSP/2017).

4. A Mesa de Contratación poderá solicitar cantos informes técnicos considere pertinentes (artigo 150.1 da LCSP/2017).

5. Nos casos en que a valoración dos criterios mediante un xuízo de valor corresponda a un comité formado por expertos ou a un organismo técnico especializado (artigo 146.2.a)



da LCSP/2017), a designación realizarase e publicarase no perfil de contratante (artigo 63.5 da LCSP/2017).

6. De maneira supletoria, o funcionamento da Mesa rexerá polo establecido no título preliminar, capítulo II, sección 3ª, subsección 1ª, da Lei 40/2015, do 1 de outubro, de réxime xurídico do sector público.

Terceiro. *Publicación e efectos*

Queda derogada a Resolución de 29 de abril de 2026 pola que se establece a composición da Mesa de Contratación Permanente da Universidade da Coruña, así como cantas disposicións de igual ou inferior rango se opoñan ao establecido nesta resolución.

Esta resolución publicarase no *Diario Oficial de Galicia* e no perfil do contratante da Universidade da Coruña, e terá efectos sete días naturais desde a súa publicación no *Diario Oficial de Galicia*.

A Coruña, 27 de xullo de 2026

Ricardo José Cao Abad
Reitor da Universidade da Coruña

